

ADYAYA I

PURWAKA

1.1 Dadalan Pikobet

Kasusastraan inggih punika saluir reriptaan parajana sane metu saking uluning angen marupa sakadi tulisan kekawian sane kawentenane luih, becik, lengut tur ngulangunin. Kasusastraan Bali inggih punika saluir reriptaan marupa ajah-ajahan sane dahat mautama, sane kasurat ngangen basa bali lan kawi tur katami ngantos rauh mangkin, inggih punika sane kasurat antuk aksara Bali lan huruf Latin. Kasusastraan Bali sampun wenten kawentenannya duk riin sadereng kakeniang aksara. Mungguing pahan-pahan kasusastraan Bali nganutin aab utawi *jaman* prasida ka kepah dados kalih pahan inggih punika kasusastraan Bali Anyar (*Modern*), lan kasusastraan Bali Purwa (*Tradisional*). Nganutin wangun Kasusastraan Bali Anyar, sida ka kepah dados tigang pahan inggih punika Gancaran Bali Anyar (*prosa*), Tembang Bali Anyar (*puisi*), Drama Bali Anyar (*drama modern*) taler yening wangun Kasusastraan Bali Purwa (*Tradisional*) sida ka kepah dados tigang pahan inggih punika gancaran, tembang, lan palawakia. Silih sinunggil wangun kasusastraan Bali sane ketah kauningin sareng yowana Bali inggih punika tembang. Tembang inggih punika wagian seni sane kasobiahang nganggen tatembangan, ngees ngucap sane ngangge laras pelog taler laras slendro. Manut Stiawan (2019) tembang inggih punika krya sastra sane madue piteket-piteket pinih mabuat pisan sane katuju majeng parajanane miwah prasida kaanggen panuntun rikala nyalanang kahuripan. Majeng ring kahuripan parajana Bali, tembang nuwe peran pinih utama tatkala wenten parikrama *keagamaan* sekadi dewa yadnya, manusa yadnya, pitra yadnya, rsi yadnya. Tembang sajeroning Kasusastraan Bali Purwa, madue wangunnyane sane sida ka kepah dados petang pahan minakadi Sekar Rare, Sekar Alit, Sekar Madia lan Sekar Agung.

Kasujatiannya daging-daging sastra punika madue gatra lan piteket sane mabuat pisan. Manut Arya (2021) kawentenan sastra bali pinih mabuat pisan kaanggen antuk ngajegang sastra lan budaya bali. Mungguing tetujon mlajahin sastra Bali puniki prasida anggen sesuluh lan panuntun pacang nincapang kahuripan sajeroning nyanggra aab gumine sane kabaos aor tan pawates (Disbud Provinsi Bali, 2007:5). Taler kawentenan aab sane sakadi mangkin macihna sampun yening gumine mangkin nenten becik

kawentenannyane, santukan ring warsa puniki pinaka warsa sane akeh wenten pikobet. Utamanyane pikobet ngenenin indik gering agung sane ketah kebaos *pandemi Covid-19*. *Pandemi* puniki ngawinang akeh wewidangan-wewidangan sane keni imbasnyane. Wenten makudang-kudang sektor sane keni imbas gering agung *pandemi Covid-19* puniki sekadi ring sektor pendidikan lan sektor pariwisata. *Pandemi Covid-19* puniki ngawinang akeh sane keni puius sekadi ring sektor pendidikan punika akeh para sisiane sane malajah saking paumahan utawi jero soang-soang nganggen piranti sane kawantu antuk jaringan utawi sane ketah kabaos *daring* utawi *online*. Mangkin para sisiane patut madue sarana utawi piranti sane kabaos *handphone (HP)* utawi *laptop* mangda para sisia prasida nyarengin paplajahan. Punika taler akeh ngawetuung paobahan pula pali pamargin pamlajahan saking pamlajahan sane pamarginnyane *tatap muka (Offline)* utawi malajah ring sekolah nanging mangkin kalaksayang saking jumlah utawi genah soang-soang. Paobahane punika sampun wenten awig-awignyane sane kawedar saking pamrintah.

Awig-awig utawi *surat keputusan bersama* sane sampun kawedar oleh *Menteri Pendidikan dan Kebudayaan, Menteri Agama, Menteri Kesehatan lan Menteri dalam negeri Republik Indonesia Nomor 03/KB/2021, Nomor 384 Tahun 2021, Nomor HK.01.08/MENKES/4242/2021, Nomor 440-717 Tahun 2021* inggih punika ngenenin indik pamargin pamlajahan ring *pandemi Covid-19* prasida kagentosin antuk pamargin pamlajahan *online (daring)*. Mawinan punika guru lan para sisia ritatkala pacang ngamargiang pamlajahan kaaptiang mangda nganggen piranti-piranti sane *berbasis teknologi*. Nanging yening nenten mresidayang ngamargiang awig-awig saking pamrintah punika, sekolah kaaptiang mangda prasida ngamargiang *protokol kesehatan* sane patut nganutin awig-awig. *Pandemi* sekadi mangkin ngawinang guru punika mangda sayan urati lan prasida ngawigunayang *model* pamlajahan sane anut tekening tetujon paplajahan lan nganutin kawentenan aab gumine sekadi mangkin. *Model* pamlajahan sane kaanggen ring *pandemine* puniki, kaaptiang mangda prasida ngewantu guru lan para sisia ritatkala ngamargiang paplajahan. Sapunapi tata cara guru ngawigunayang *model* pamlajahan sane becik mangda para sisia punika prasida nyarengin lan dangan ngeresep tekening daging-daging paplajahan. *Model* pamlajahan sane sida kaanggen olih guru tatkala *pandemi* puniki inggih punika *model* pamlajahan *blanded learning*. Manut Dwiyogo (2018:59) *blanded learning* inggih punika pacampuhan saking pamlajahan *tatap*

muka, online miwah offline. Dewantara, dkk (2020) kawentenan *blended learning* pinih mawiguna sane kaanggen antuk ngamecikang pamlajahan *tatap muka* utawi *offline* lan *online* santukan prasida anggen nyangkepin kakirangan saking kalih *model* pamlajahan.

Model pamlajahan *blended learning* puniki kaanggen antuk *memfasilitasi* sisia ring ngembangang widya santukan galah sane kaanggen malajah nenten *mencukupi* ring pamlajahan *tatap mukha* saha pinaka jalaran sane becik kaanggen nepasin pikobet ngenenin indik kawentenan gering agung *Covid-19*. Kawentenan pamargin pamlajahan sane ngawigunayang *model blended learning* puniki madue makudang-kudang kaluihan inggih punika guru lan sisia prasida nyarengin paplajahan *secara fleksibel*, sisia prasida malajah praragan (*mandiri*), nincapang widya (*wawasan*) sisia, nenten kebanda antuk galah lan genah. Ring *model* pamlajahan puniki media utawi piranti-piranti sane prasida kaanggen *manunjang* pamlajahan sekadi *e-mail, from, blog, audio video*, lan sane lianan taler wenten makudang-kudang *aplikasi* sane prasida kanggen nyarengin pamlajahan *model blended learning* puniki sekadi *aplikasi whatsapp, zoom, lan google meet*. Silih sinunggil piranti sane panilik lagi kaanggen ngewantu nyarengin pamlajahan *model blended learning* inggih punika ngawigunayang *aplikasi discord*.

Silih sinunggil piranti pamlajahan sane prasida ngewantu ritatkala pacang ngamargiang *model* pamlajahan *blended learning* inggih punika ngawigunayang *aplikasi discord*. Manut Dewantara, dkk (2020) pamlajahan sane ngawigunayang *aplikasi discord* ri sajeroning *model* pamlajahan *blended learning* pinaka utsaha sane *alternatif* kaangen antuk nincapang kawagedan lan widya sisia rikala malajah. Ngawigunayang *aplikasi discord* ring sajeroning pamlajahan nganggen *model blended learning* prasida ngawetuung akeh kaluihan sane kapolihang oih guru miwah para sisia. Dewantara, dkk (2020) Kaluihan *aplikasi discord* inggih punika sang sane nganggen aplikasi prasida *berkomunikasi secara online* lan suara sane kapolihang pedas/jernih kapirek miwah prasida ngaryanang *gorup komunikasi* sane *khusus*. *Aplikasi discord* ring aab sane sakadi mangkin wantah para *gamers* kemanten sane uning ngenenin indik *aplikasine* punika, nanging aab mangkin sane sampun kakeniang *wabah virus corona* utawi *covid-19* sang sane ngaryanin *aplikasine* puniki sampun *mengupdate* utawi ngicen paubahan ring *aplikasi discord* mangda *aplikasi* puniki prasida kaanggen nyarengin pamlajahan *online* miwah *offline* sakadi mangkin yadiastun wau akidik jadma sane uning taler nganggen ri

kala ngamargiang pamlajahan *online/daring* miyah *offline*. *Aplikasi discord* puniki nenten akeh nelasang kuota taler indik *gangguan signal (jaringan)* wantah 1 *pihak (admin)* kemanten sane keni lan nenten *merembet* ka *peserta* sane lianan. Yening kacingak saking kawentenan aab sakadi mangkin taler kaluihan saking *aplikasi* puniki, patut lan prasida kaanggen nyarengin pamargin pamlajahan *online* miyah *offline*. *Aplikasi discord* madue fitur-fitur sakadi fitur dokumen, kamera, *share screen*, *video call*, *voice call*, *member/kontak*, taler wenten *server* utawi *group* sane prasida kaanggen mabligbagan. *Fitur server* sane wenten ring *aplikasi discord* puniki sane ngawinang guru miyah para sisia prasida nyarengin pamargin pamlajahan *model blended learning* puniki, santukan guru kari akehan nerangang tur ngicenin akeh teori pupuh kemanten. Parindikane punika sida ngawinang para sisia ten waged utawi kari kirang ring pamlajahan nembangang pupuh. Beciknyane guru punika mangda ngrereh utawi nganggen piranti pamlajahan sane *variatif* lan *inovatif* mangda para sisia punika dangan malajah nembangang pupuh Durma.

Piranti pamlajahan punika prasida ngawetuung pikolih pamlajahan sane becik ring kelas miyah ring paplajahan nganggen *model blended learning*. Kawagedan guru ri kala ngajain punika nenten je kacingak ri kala sampun ngicen paplajahan manten. Nanging ri kala sisia sampun prasida uning tur ngresep napi paplajahan sane sampun kaicen. Nika mawinan, guru punika kaptiang mangda prasida nganggen piranti pamlajahan sane becik tur patut taler nganutin sareng pamlajahan *model blended learning* mangda samian sisia kadutdut manahne malajahin tembang taler mangda dangan mlajahin indik tembang pamekasnyane nembangang pupuh durma. Pamlajahan basa Bali sane nganggen aplikasi discord punika becik lan menarik kaanggen nembangang pupuh durma, santukan sakadi sang sane ngawi aplikasine puniki (Jason Citron, 2015), aplikasi discord madue fitur-fitur sane mirip tekening aplikasi whatsapp. Sakadi fitur video call miyah voice call sane wenten ring aplikasi discord ngawinang guru punika sayan praktis ri kala ngajain, nenten nelasang kuota sane akeh taler nenten nelasang galah sane akeh, asapunika taler para sisia sane nyarengin prasida nguratiang guru ri kala nembangang pupuh durma pastika gambar miyah suarannya jernih taler ring aplikasi punika wantah siki pihak (admin) sane keni *gangguan signal (jaringan)*. Aplikasi *discord* puniki sida *kadownload* ring *handphone IOS* lan *Android*, sakadi ring *Hp Android* punika *kadownload* ring *playstore*. Napi malih ring aab sane mangkin *aplikasi discord* punika sampun akeh kanggen oih

krama Indonesia utamanyane para sisia kelas XI IPS 2 ring SMA Negeri 2 Banjar. Pamlajahan ring aab sakadi mangkin sane katiben antuk kawentenan pandemi Covid-19 niki nenten mresidayang kamargiang ring kelas, nanging pamlajahan mangkin sampun akehan nganggen pamlajahan online sane sampun berbasis teknologi. Nika mawinan paplajahan basa Bali indik materi tembang beciknyane kasarengin antuk nganggen model pamlajahan *blended learning* nganggen *aplikasi discord* punika sane ngawinang para sisiane pacang kresep ngenenin indik napi sane sampun kaplajahin taler para sisia prasida nincapang kawagedan matembang pupuh durma. Lianan punika kaaptiang mangda para sisiane punika prasida ngupapira, ngwrediang, tur ngelimbakang budaya baline sane pinaka tetamian leluhur iraga.

Kadasarin antuk dadalan pikobet sane sampun katlatarang ring duur, kawentenan *aplikasi discord* dahat mawiguna pisan kaanggen nincapang kawagedan sisia ring pamlajahan matembang pupuh durma. Pidabdab antuk nganggen *aplikasi discord* sajeroning pamlajahan *online* puniki prasida nuntun pemargin guru ritatkala ngicenin peplajahan nembangang pupuh, pamekasnyane nembangang pupuh durma. Sisia pacang polih pauruk saking *video call* miyah *voice call* guru ri kala matembang ring *aplikasi discord* sane ngawinang para sisia punika gelis ngresep. Punika ngawinang panilik meled nglaksananyang tetilikan sane mamurda “*Applikasi Discord* Kaanggen Nincapang Kawagedan Matembang Pupuh Durma Sisia Kelas XI IPS 2 SMA Negeri 2 Banjar”.

1.2 Ngrereh Pikobet

Sajeroning tetilikan puniki, panilik nemuning makudang-kudang pikobet sane mapaiketan tekening dadalan pikobet sane sampun kabahbahang ring duur. Pikobet sane prasida karerehang mangda wenten paiketannyane sareng peplajahan mapupuh utawi matembang melarapan antuk media *aplikasi discord* mangda prasida nincapang kawagedan matembang pupuh durma sisia kelas XI IPS 2 SMA Negeri 2 Banjar. Pikobet sane kakeniang minakadi, (1) Sapunapi pidabdab sajeroning ngawigunayang *aplikasi discord* kaanggen nincapang kawagedan sisia Kelas XI IPS 2 SMA Negeri 2 Banjar nembangang Pupuh Durma? (2) Napikeh prasida *aplikasi discord* punika kaanggen nincapang kawagedan sisia Kelas XI IPS 2 SMA Negeri 2 Banjar nembangang Pupuh Durma? (3) Sapunapi penampen sisia Kelas XI IPS 2 SMA Negeri 2 Banjar ngenenin indik kawentenan *aplikasi discord* sane kaanggen mlajah nembangang Pupuh Durma? (4)

Sapunapi kawagedan sisia Kelas XI IPS 2 SMA Negeri 2 Banjar negesin Pupuh Durma? (5)

Sapunapi kawagedan nyurat Pupuh Durma sisia Kelas XI IPS 2 SMA Negeri 2 Banjar?

1.3 Ngwatesin Pikobet

Sajeroning tetilikan sane pacang kalaksanayang puniki, panilik nureksain malih pikobet-pikobet sane sampun karereh. Pikobet punika kawatesin santukan wenten makudang-kudang parindikan minakadi, tetilikan sane kabanda antuk galah, ngicenin *kesempatan* majeng panilik tiosan mangda prasida kajangkepin lan kaparipurnayang tetilikan puniki saha ngamargiang tetilikan manut kaweruhan widya sane lianan. Pikobet sane kawatesin inggih punika (1) Pidabdab ngawigunayang *aplikasi discord* kaanggen nincapang kawagedan sisia nembangang Pupuh Durma (2) *Aplikasi discord* prasida kaanggen nincapang kawagedan sisia Kelas XI IPS 2 SMA Negeri 2 Banjar nembangang Pupuh Durma (3) penampen sisia Kelas XI IPS 2 SMA Negeri 2 Banjar ngenenin indik kawentenan *aplikasi discord* sane kaanggen malajah nembangang Pupuh Durma.

1.4 Bantang Pikobet

Kadasarin antuk dadalan pikobet sane sampun kabahbahang sakadi ring duur, prasida kapolihang bantang pikobetnyane sakadi ring sor.

1. Sapunapi pidabdab sajeroning ngawigunayang *aplikasi discord* kaanggen nincapang kawagedan sisia Kelas XI IPS 2 SMA Negeri 2 Banjar nembangang Pupuh Durma?
2. Napikeh prasida *aplikasi discord* punika kaanggen nincapang kawagedan sisia Kelas XI IPS 2 SMA Negeri 2 Banjar nembangang Pupuh Durma?
3. Sapunapi penampen sisia Kelas XI IPS 2 SMA Negeri 2 Banjar ring kawentenan *aplikasi discord* sane kaanggen malajah nembangang Pupuh Durma?

1.5 Tetujon Tetilikan

Kadasarin antuk bantang pikobet sane sampun karincikang ring duur, tetujon tetilikan puniki inggih punika:

1. Mangda sida kaanggen nelatarang indik pidabdab pamlajahan sajeroning ngawigunayang *aplikasi discord* anggen nincapang kawagedan sisia Kelas XI IPS 2 SMA Negeri 2 Banjar nembangang Pupuh Durma.

2. Mangda prasida kaanggen nelatarang panincapan kawagedan sisia Kelas XI IPS 2 SMA Negeri 2 Banjar nembangang Pupuh Durma nganggen *aplikasi discord*.
3. Mangda prasida kauningin indik penampen para sisia Kelas XI IPS 2 SMA Negeri 2 Banjar ngenenin indik *aplikasi discord* sane kaanggen malajah nembangang Pupuh Durma.

1.6 Kawigunan Tetilikan

Kawigunan telitikan sane mamurda *Aplikasi discord* Kaanggen Nincapang Kawagedan Matembang Pupuh Durma Sisia Kelas XI IPS 2 SMA Negeri 2 Banjar inggih punika :

1.6.1 Kawigunan Pamucuk (Teoritis)

Pikolih saking tetilikan puniki kaaptiang sumangdena mawiguna ring sajeroning panglimbakan widya (teori) indik *aplikasi discord* kaweruhan ring widya paguron-guron, cutetnyane ring pamlajahan basa Bali sane marupa tembang utawi pupuh utaminyane indik pupuh durma.

1.6.2 Kawigunan Panglimbak (Praktis)

Kawigunan panglimbak sane kapolihang saking kawentenan ring tetilikan puniki inggih punika:

a. Majeng Sisia

Kawigunan tetilikan majeng sisia inggih punika kaanggen *ilmu* sumangdena sisia uning tur sida ngresepang indik tata cara nembangang pupuh utaminyane indik pupuh durma.

b. Majeng Guru

Kawigunan tatilikan majeng Guru inggih punika kaaptiang mangda sida nguningin kaiwangan-kaiwangan, lan pikobet-pikobet sane kapanggihin ritatkala nembangang pupuh durma manut saking guru dingdong. Taler guru prasida ngicenin tuntunan sane anut ngenenin indik kakirangan sane kapanggihin oih sisianyane.

c. Majeng panilik sane siosan

Kawigunan majeng ring panilik sane siosan mangda prasida kaanggen *acuan* ring sajeroning tetilikan selanturnyane sane mapaiketan sareng tetilikane puniki.

d. Majeng panilik

Saking pikolih tetilikan puniki, mangda prasida anggen dasar majeng panilik tatkala benjang pungkur lagi pacang ngajahin ring sekolah-sekolah nganggen metode pamlajahan sane inovatif.

